



Na osnovu člana 13. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj: 49/06 i 51/09), člana 171. Zakona o socijalnoj zaštiti, zaštiti civilnih žrtava rata i zaštiti porodice sa djecom („Službene novine Kantona Sarajevo“, broj 38/14- prečišćeni tekst, 38/16, 44/17, 28/18, 52/21, 40/22 i 13/25), člana 19. stav 1. tačka 4 i 141. stav 3. Statuta Općine Novo Sarajevo („Službene novine Kantona Sarajevo“ broj: 5/20- prečišćeni tekst i 20/20 -ispravka), i člana 16. stav 2. tačka a) Odluke o izvršavanju Budžeta Općine Novo Sarajevo za 2026. godinu („Službene novine Kantona Sarajevo“ broj: 1/26), Općinsko vijeće Novo Sarajevo na nastavku 11. redovne sjednice, održanom dana 17.3.2026. godine, donijelo je

**ODLUKU
O USLOVIMA, NAČINU, KRITERIJIMA I IZNOSU SREDSTAVA ZA DODJELU
JEDNOKRATNE NOVČANE POMOĆI LICIMA I DOMAĆINSTVIMA SA PODRUČJA
OPĆINE NOVO SARAJEVO**

**Član 1.
(Predmet)**

Ovom Odlukom utvrđuje se uslov, način i iznos sredstava za dodjelu jednokratne novčane pomoći licima i domaćinstvima sa područja općine Novo Sarajevo (u daljem tekstu jednokratne pomoći).

**Član 2.
(Gramatička terminologija)**

Gramatička terminologija korištenja muškog ili ženskog spola podrazumijeva uključivanje oba spola.

**Član 3.
(Izvori sredstava)**

Novčana sredstva za dodjelu jednokratne pomoći obezbjeđuju se u Budžetu Općine Novo Sarajevo za tekuću budžetsku godinu, a u skladu sa finansijskim mogućnostima.

**Član 4.
(Korisnici prava)**

Sredstva se dodjeljuju licima i domaćinstvima koja imaju prebivalište na području općine Novo Sarajevo najmanje jednu godinu prije podnošenja zahtjeva.

**Član 5.
(Namjena sredstava)**

Sredstva predviđena za jednokratnu pomoć isplaćivat će se za sljedeće namjene:

- a) Naknada za teške bolesti;
- b) Licima i domaćinstvima u stanju socijalne potrebe;
- c) Porodice koje imaju dijete ometeno u fizičkom ili psihičkom razvoju;
- d) Sufinansiranje sahrane / dženaze penzionera

Član 6. (Uslovi za dodjelu)

Pravo na jednokratnu pomoć imaju porodice koje ispunjavaju sljedeće uslove:

- a) Za naknadu za teške bolesti, ostvaruje se pravo na jednokratnu pomoć, a prema Listi teških bolesti, odnosno teških tjelesnih povreda temeljem kojih se ostvaruje naknada za slučaj invalidnosti teške bolesti („Službene novine Federacije BiH“, broj:18/25). Razmatranje prijava će se vršiti na osnovu dokaza i medicinske dokumentacije iz nadležne zdravstvene ustanove da se radi o teškoj bolesti. Za navedene namjene lica sa malignim oboljenjima u prvoj godini liječenja mogu ostvariti jednokratnu novčanu pomoć u maksimalnom iznosu od 1000,00 KM, a narednih šest godina liječenja po 500,00 KM. Za participaciju u nabavci lijekova, ortopedskih pomagala i drugih medicinskih aparata, ostvaruje se pravo na jednokratnu novčanu pomoć za koje nije predviđena participacija ili je predviđena djelimična participacija od Zavoda zdravstvenog osiguranja Kantona Sarajevo, a propisani su od strane nadležne zdravstvene ustanove kao terapija ili sredstvo koje će uticati na poboljšanje zdravstvenog stanja lica, uz dokaz o ukupnim troškovima.
- b) Porodice koje imaju dijete ometeno u fizičkom ili psihičkom razvoju, što se dokazuje pravosnažnim rješenjem donesenim u skladu sa Pravilnikom o utvrđivanju preostale sposobnosti i razvrstavanju djece i omladine ometene u psiho-fizičkom razvoju („Službene novine Kantona Sarajevo“, broj: 20/08, 5/12, 4/15 i 4/18), a do navršenih 27 godina života, mogu ostvariti pravo na jednokratnu novčanu pomoć.
- c) Lica i domaćinstva u stanju socijalne potrebe mogu ostvariti jednokratnu novčanu pomoć i to:
 - 1) Lica i domaćinstva bez stalnih primanja,
 - 2) Lica i domaćinstva koja se nađu u stanju socijalne potrebe, a čiji prihod po članu zajedničkog domaćinstva ne prelaze iznos 20% prosječne plate ostvarene u Kantonu Sarajevo u prethodnoj godini u skladu sa važećom Instrukcijom o iznosima novčanih davanja po Zakonu o socijalnoj zaštiti, zaštiti civilnih žrtava rata, i zaštiti porodica s djecom, pri čemu se prihod definiše kao zbir svih primanja članova domaćinstva po bilo kom osnovu.

Navedeno pravo ne mogu ostvariti čiji je član zajedničkog domaćinstva vlasnik privrednog društva ili ima registrovanu obrtničku ili srodnu djelatnost.
- d) Jednokratna novčana pomoć za sufinansiranje sahrane / dženaze penzionera
Pravo mogu ostvariti članovi uže porodice ili osoba koja je platila sahranu/dženazu umrlog penzionera, pod uslovom da dostave sve tražene dokaze i originalne račune koji moraju glasiti na ime podnosioca prijave na javni poziv. Sredstva se mogu koristiti isključivo za pokriće troškova sahrane/dženaze umrlog penzionera;

Član 7. (Postupak dodjele sredstava)

Novčana sredstva iz člana 4. ove Odluke dodjeljivat će se na osnovu podnesenih prijava na Javni poziv koji raspisuje Općinski načelnik, a koji se objavljuje početkom budžetske godine na web stranici i oglasnoj ploči Općine i ostaje otvoren do kraja tekuće budžetske godine, odnosno do utroška planiranih sredstava za tekuću godinu.

Član 8. (Sadržaj Javnog poziva)

Javni poziv treba da sadrži sljedeće elemente:

- a) naziv organa koji raspisuje Javni poziv,
- b) predmet Javnog poziva, odnosno svrhu i namjenu sredstava koja su predmet dodjele,
- c) ukupna finansijska sredstva potrebna za provođenje Javnog poziva, uključujući najniži i najviši iznos koji se može dodijeliti po korisniku,
- d) uslovi koje podnosioci prijave moraju ispunjavati kako bi ostvarili pravo na dodjelu novčanih sredstava u skladu sa Javnim pozivom,
- e) vremenski period za koji se Javni poziv raspisuje,

Općina Novo Sarajevo, ulica Zmaja od Bosne br. 55, centrala telefon (387 33) 492 100

Općinsko vijeće Novo Sarajevo

tel: (387 33) 492 268, fax: (387 33) 650 397, email: vijece@novosarajevo.ba

Identifikacioni broj: 4200558710008 PDV broj: 200558710008 Porezni broj: 0170333000

Depozitni račun 1411965320011288 Bosna Bank International d.d



f) obavezna dokumentaciju koju je potrebno priložiti uz prijavu, kao i forma i način dostavljanja prijave, rok za podnošenje prijave, bitne napomene, uključujući upute o načinu podnošenja prijave (lično, poštom), kontakt podatke podnosioca prijave, napomenu o neprihvatanju nepotpunih i neblagovremenih prijava, kao i informacije o postupku razmatranja i donošenja odluke.

Član 9. (Visina pomoći)

- (1) Iznos sredstava koji podnosioci prijava mogu ostvariti su:
 - a) Naknada za teške bolesti – do 1.000,00 KM;
 - b) Porodice koje imaju dijete ometeno u fizičkom ili psihičkom razvoju – 500,00 KM;
 - c) Lica i domaćinstva u stanju socijalne potrebe – za jednog člana domaćinstva 200,00 KM, svakog narednog člana po 100,00 KM;
 - d) Sahrane / dženaze penzionera – 300,00 KM.
- (2) Ukoliko podnosioci prijava iz stava (1) tačke a), b) i c) ovog člana ispunjavaju uslove po više osnova mogu ostvariti istovremeno jednokratnu pomoć po svim osnovama, ali najviše u iznosu od 1.000,00 KM
- (3) Izuzetno, Komisija može predložiti Općinskom načelniku dodjelu većeg iznosa u posebnim, dokumentovanim slučajevima.

Član 10. (Postupak ostvarivanja prava)

- (1) Prijave sa potpunom dokumentacijom za ostvarivanje prava podnose se Komisiji za razmatranje prijava za dodjelu jednokratne novčane pomoći licima i domaćinstvima sa područja Općine Novo Sarajevo (u daljem tekstu Komisija) putem Službe za socijalna pitanja, zdravstvo, izbjeglice i raseljena lica (u daljem tekstu Služba), a predaju se na Protokol Općine Novo Sarajevo.
- (2) U svrhu rješavanja podnesenih prijava Općinski načelnik imenuje Komisiju za razmatranje, a koja se sastoji od tri člana i jednog zamjenskog člana.
- (3) Za potrebe Komisije Služba obavlja administrativno-tehničke poslove.
- (4) Dokumentacija koju je potrebno priložiti uz prijavu po objavljenom Javnom pozivu bit će navedena u posebnom obrascu koji će biti sastavni dio Javnog poziva.
- (5) Komisija će kontinuirano prema redoslijedu zaprimljenih prijava po Javnom pozivu nakon uvida u priloženu dokumentaciju i utvrđivanja ispunjavanja uslova za dodjelu novčanih sredstava dostaviti Prijedlog za dodjelu novčanih sredstava, na osnovu kojeg će Općinski načelnik putem Službe donijeti Zaključak o odobravanju isplate sredstava.
- (6) Prijave za koje Komisija utvrdi da ne ispunjavaju propisane uslove, kao i prijave podnesene nakon utroška sredstava, bit će odbijene o čemu će Služba obavijestiti podnosioca prijave pismenim putem.
- (7) Služba će pismenim putem obavijestiti i podnosioca prijave koji su ostvarili pravo na novčanu pomoć.
- (8) Podnesene prijave važe samo za budžetsku godinu u kojoj je prijava podnesena.
- (9) Pravo na jednokratnu novčanu pomoć može se ostvariti samo jednom u toku kalendarske godine.

Član 11. (Isplata novčanih sredstava)

- (1) Isplata jednokratne pomoći vršit će se uplatom na transakcijski račun podnosioca prijave putem Službe za privredu, budžet i finansije.
- (2) O realizaciji sredstava, po odredbama ove Odluke, Općinski načelnik informiše Općinsko vijeće jednom godišnje.

Općina Novo Sarajevo, ulica Zmaja od Bosne br. 55, centrala telefon (387 33) 492 100

Općinsko vijeće Novo Sarajevo

tel: (387 33) 492 268, fax: (387 33) 650 397, email: vijece@novosarajevo.ba

Identifikacioni broj: 4200558710008 PDV broj: 200558710008 Porezni broj: 0170333000

Depozitni račun 1411965320011288 Bosna Bank International d.d



Član 12.
(Izuzeci)

Pravo ne mogu ostvariti lica koja ostvaruju pravo putem Službe za boračko-invalidsku zaštitu Općine i lica/članovi domaćinstva koja imaju utvrđen status po propisima iz oblasti boračko invalidske zaštite.

Član 13.
(Prelazne i završne odredbe)

Stupanjem na snagu ove Odluke prestaje da važi prethodna Odluka o uslovima, načinu, kriterijima i iznosu sredstava za dodjelu jednokratne novčane pomoći licima i domaćinstvima sa područja općine Novo Sarajevo („Službene novine Kantona Sarajevo“, br. 19/21 i 19/22)

Član 14.
(Stupanje na snagu)

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

Broj:02OV-01-1-1189/26
Sarajevo, 17.03.2026.godine

PREDSJEDAVAJUĆI
OPĆINSKOG VIJEĆA NOVO SARAJEVO

Mr.sci. Edison Pavlović